



Adresa: **Ul. Hamdije Čemerlića 39a**
71000 Sarajevo
<http://www.voda.ba>

tel. +387 33 726 400
fax. +387 33 726 423
e – mail: info@voda.ba

Broj: **UP-1/21-3-40-528-7/23**
Datum: **12.03.2024. godine**

Agencija za vodno područje rijeke Save» Sarajevo rješavajući po zahtjevu pravnog lica «MGV GRADNJA» d.o.o. Zavidovići za donošenje rješenja o vodnoj dozvoli za aktivnost koja može privremeno ili trajno degradirati kvalitet voda ili ometati poboljšanje njihovog postojećeg kvaliteta u postupku rada i za ispuštanje tehnoloških otpadnih voda u prirodni recipijent sa lokaliteta betonare sa postrojenjem za proizvodnju praškastih materijala u ul Tvornička, u Zavidovićima, na osnovu člana 109. stav (1) tačka 2. i stav (2) tačka 1. Zakona o vodama («Službene novine Federacije BiH», broj 70/06) i člana 200. stav (1) Zakona o upravnom postupku («Službene novine Federacije BiH», broj 2/98, 48/99 i 61/22), donosi

RJEŠENJE **o vodnoj dozvoli**

1. Pravnom licu, «MGV GRADNJA» d.o.o. Zavidovići daje se vodna dozvola za aktivnost koja može privremeno ili trajno degradirati kvalitet voda ili ometati poboljšanje njihovog postojećeg kvaliteta u postupku rada i za ispuštanje tehnoloških otpadnih voda u prirodni recipijent sa lokaliteta betonare sa postrojenjem za proizvodnju praškastih materijala u ul Tvornička izgrađene na zemljištu označenom kao k.č. broj: 1295/4 K.O. Zavidovići, općina Zavidovići.
2. Ova vodna dozvola se odnosi isključivo za ispuštanje tehnoloških otpadnih voda u prirodni recipijent za objekat definisan tačkom 1. ovog Rješenja i ne oslobađa podnosioca zahtjeva obaveze pribavljanja vodne dozvole za ispuštanje sanitarno-fekalnih otpadnih voda, a za čije izdavanje je nadležno Ministarstvo za poljoprivredu, šumarstvo i vodoprivredu Zeničko-dobojskog kantona ili općina, ukoliko je kantonalnim propisom prenesena nadležnost na općinu, shodno stavu (3) istog člana zakona.
3. Vodna dozvola se daje na osnovu dostavljene dokumentacije, utvrđenog činjeničnog stanja i uz sljedeće uslove:
 - 3.1. Da se upotreba i korištenje predmetne betonare i postrojenja za proizvodnju praškastih materijala vrši u skladu sa njegovom prirodom i namjenom te u skladu sa dostavljenom dokumentacijom i uslovima iz ove vodne dozvole.
 - 3.2. Da se, u skladu sa dostavljenim dinamičkim planom ovjerenim i potpisanim od strane odgovornog lica podnosioca zahtjeva, a koji je sastavni dio ovog Rješenja, do 31.12.2025. godine završe radovi na prikupljanju i tretmanu tehnoloških otpadnih voda te ispuštanju prečišćenih voda u rijeku Bosnu sa platoa predmetnog objekta u ul Tvornička, grad Zavidovići, kako slijedi:

R. broj	Naziv aktivnosti	Finansijska procjena za realizaciju aktivnosti	Rok za realizaciju aktivnosti
1	Izgradnja revizionog okna za monitoring prije ispusta prečišćenih voda sa prostora betonare u rijeku Bosnu	1.500,00KM	30.05.2024.
2	Polaganje novog cjevovoda od revizionog okna do mjesta ispusta u rijeku Bosnu	500,00KM	31.07.2024.
3	Izrada projekta izvedenog stanja sistema za prikupljanje i tretman otpadnih voda	2.000,00KM	30.09.2024.
4	Završno uređenje platoa, radnih i	148.500,00KM	31.12.2025.

	manipulativnih površina kompleksa		
--	-----------------------------------	--	--

- 3.3. Da korisnik predmetnog objekta, za vrijeme trajanja ove dozvole, a nakon završetka planiranih radova, obezbjeđuje da se onečišćene tehnološke otpadne vode sa radnih i manipulativnih površina nesmetano sakupljaju i odvođe do objekta predviđenog za tretman (separator masti i ulja, taložnik), a zatim ovako tretirane vode ispuštaju u rijeku Bosnu.
- 3.4. U skladu sa članom 26.a Uredbe o uslovima ispuštanja otpadnih voda u okoliš i sisteme javne kanalizacije («Službene novine Federacije BiH», broj 26/20, 96/20 i 1/24) nosilac prava iz ove vodne dozvole dužan je izvještavati nadležnu Agenciju i Federalno ministarstvo okoliša i turizma o realizaciji planiranih aktivnosti u zadatim rokovima iz detaljnog dinamičkog plana, prvi put najkasnije do 31.12.2024. godine a drugi put najkasnije do 30.06.2025. godine na obrascu iz Priloga B navedene Uredbe.
- 3.5. U toku važenja ovog Rješenja, korisnik predmetnog objekta je obavezan poduzeti sve potrebne mjere kako bi kvalitet prečišćenih otpadnih voda prije ispusta u recipijent - rijeka Bosna na dva mjerna mjesta, zadovoljio granične vrijednosti definisane u Prilogu 27. Uredbe o uslovima ispuštanja otpadnih voda u okoliš i sisteme javne kanalizacije.
- 3.6. Objekte čija je svrha prikupljanje, odvodnja i tretman tehnoloških i onečišćenih oborinskih otpadnih voda nastalih u krugu kompleksa (taložnik, uređaja za tretman otpadnih voda, slivnici, kanalizaciona mreža) potrebno je održavati i koristiti na takav način koji će obezbijediti njihovu potpunu ispravnost i funkcionalnost. O načinu i vremenu održavanja radova neophodno je voditi službenu evidenciju i arhivu.
- 3.7. U toku izvođenja radova na predmetnom lokalitetu neophodno je osigurati stručni nadzor nad izvođenjem istih te poduzeti sve potrebne mjere zaštite da predmetnim aktivnostima ne dođe do nastanka štete ili nepovoljnih posljedica po vode i vodni režim kao i postojeće korisnike voda.
- 3.8. Materijal iskopan u toku izvođenja radova na izgradnji revizionog okna i polaganju cjevovoda kao i ostali opasni i neopasni otpad, talog iz taložnika i uređaja za tretman otpadnih voda se ne smiju ni privremeno odlagati na česticu «vodno dobro», odnosno u vodotoke i na njegove obale.
- 3.9. Čišćenje i održavanje postrojenja za tretman otpadnih voda, te skladištenje i zbrinjavanje sadržaja (taloga) iz postrojenja može vršiti isključivo firma ovlaštena za tu vrstu djelatnosti, prema posebnom ugovoru. O načinu i vremenu pražnjenja, odvoza i zbrinjavanja sadržaja iz postrojenja za tretman otpadnih voda kao i preuzimanje drugog otpada neophodno je voditi službenu evidenciju i arhivu.
- 3.10. Da se u skladu sa propisima iz oblasti zaštite okoliša, vrši bezbjedno i redovno skupljanje čvrstog opasnog i neopasnog otpada sa kompletnog kruga kompleksa (adekvatnim mjerama onemogućiti bilo kakvo isticanje i rasipanje opasnih i štetnih materija na tlo i u vode), isti propisno skladištiti do njegovog konačnog zbrinjavanja od strane ovlaštene organizacije.
- 3.11. Korisnik predmetnog objekta je dužan, putem laboratorije ovlaštene od strane Federalnog ministarstva poljoprivrede, vodoprivrede i šumarstva, vršiti redovna ispitivanja kvaliteta otpadnih voda, uzimanjem uzorka efluenta iz oba okna za monitoring u skladu sa Uredbom o uslovima ispuštanja otpadnih voda u okoliš i sisteme javne kanalizacije. Učestalost i način ispitivanja vršiti u skladu sa članom 20. Uredbe o uslovima ispuštanja otpadnih voda u okoliš i sisteme javne kanalizacije. Rezultate analiza dostaviti ovoj Agenciji. Izvještaje o ispitivanju i ocjeni kvaliteta otpadnih voda može uraditi isključivo laboratorija ovlaštena od strane Federalnog ministarstva poljoprivrede, vodoprivrede i šumarstva po osnovu člana 64. stav (3) Zakona o vodama i Pravilnika o uslovima koje moraju ispunjavati referentne odnosno ovlaštene laboratorije za ispitivanje voda, sadržaj i način davanja ovlasti («Službene novine Federacije BiH», broj broj 14/10, 14/13, 26/14, 23/17 i 41/20).
- 3.12. Investitor je obavezan pridržavati se svih mjera i uslova propisanih u saglasnostima i dozvolama izdatim od strane drugih nadležnih organa, a odnose se na korištenje i zaštitu voda i nisu u suprotnosti sa uslovima iz ove vodne dozvole.
4. Vlasnik, odnosno korisnik objekta je obavezan voditi propisne evidencije, te nadležnim organima dostavljati propisane obrasce (Obrazac EBS) u skladu sa Zakonom o vodama i Pravilnikom o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte vodne naknade i posebnih vodnih naknada («Službene novine Federacije BiH» brni

- 92/07, 46/09, 79/11, 88/12 i 03/16), Prilog 1. Poglavlje V – Određivanje koeficijenata zagađenja za zagađivače voda kod kojih se ne vrše direktna mjerenja voda, te prema dostavljenim obrascima izvršavati u cjelosti i u propisanim rokovima obavezu plaćanja vodnih naknada.
5. U periodu važenja ove dozvole, Korisnik je dužan provoditi sve mjere i aktivnosti propisane istom.
 6. U slučaju vanrednih situacija, havarijskih onečišćenja i drugih sličnih okolnosti čime bi bio ugrožen kvalitet podzemnih i površinskih voda obavezno izvijestiti nadležne organe i postupati po nalogu mjerodavnih institucija te preduzimati hitne mjere i aktivnosti na sprečavanju širenja onečišćenja i na otklanjanju uzroka onečišćenja.
 7. Ukoliko usljed štetnog djelovanja voda nastalog zbog neizgrađenosti ili nedovoljne osposobljenosti (zaštitnih) vodnih objekata dođe do nastanka štete na predmetnom objektu obuhvaćenom ovom vodnom dozvolom, korisnik zaštitnih vodnih objekata nije odgovoran za nastale štete.
 8. Prava stečena po ovoj dozvoli ne mogu se prenositi na treća lica, a ista prestaju u skladu sa odredbama Zakona o vodama.
 9. Ukoliko prilikom upotrebe predmetnog objekta za koji se izdaje ova vodna dozvola dođe do promjene režima površinskih i podzemnih voda, a te promjene prouzrokuju štete ma kakvog karaktera, korisnik objekta je dužan uzroke štete otkloniti, a nastale štete nadoknaditi.
 10. U ovoj upravnoj stvari plaćene su sve upravne takse.
 11. Ova vodna dozvola, shodno članu 26. stav 1. Uredbe o uslovima ispuštanja otpadnih voda u okoliš i sisteme javne kanalizacije se daje sa rokom važenja 30.06.2026. godine, uz uslov da se aktivnosti obuhvaćene tačkom 3. dispozitiva rješenja u cjelosti poštuju.
 12. Prije isteka važnosti ove dozvole, korisnik je dužan da podnese zahtjev za izdavanje nove vodne dozvole.
 13. Ovo rješenje o vodnoj dozvoli može se izmjeniti ukoliko za to nastupe razlozi utvrđeni u članu 130. stav (1) tačka 1., 2., 3. ili 4. Zakona o vodama, a zainteresirane stranke podnesu argumentiran zahtjev za izmjenu ovog vodnog akta.

Obrazloženje

Pravno lice «MGV GRADNJA» d.o.o. Zavidovići, dana 24.11.2023. godine, podnijelo je zahtjev za izdavanje vodne dozvole za aktivnost koja može privremeno ili trajno degradirati kvalitet voda ili ometati poboljšanje njihovog postojećeg kvaliteta u postupku rada i za ispuštanje tehnoloških otpadnih voda u prirodni recipijent sa lokaliteta betonare sa postrojenjem za proizvodnju praškastih materijala u ul Tvornička na zemljištu označenom kao k.č. broj: 1295/4 K.O. Zavidovići, grad Zavidovići.

U provedenom postupku dostavljena je i pregledana sljedeća dokumentacija:

- Ovjereni kopija Aktuelnog izvoda iz sudskog registra broj: 043-0-RegZ-23-003080 izdatog dana 31.10.2023. godine od strane Općinskog suda u Zenici,
- Ovjereni kopija Uvjerenja o poreznoj registraciji izdatog dana 23.09.2011. godine od strane Porezne uprave – Kantonalni ured Zenica,
- Kopija Rješenja o legalizaciji bespravno izgrađenih objekata broj: 12-23-1497/08 izdatog dana 09.09.2009. godine od strane Ministarstva za prostorno uređenje, promet i komunikacije i zaštitu okoline Zeničko-dobojskog kantona (izdato za GPD «KRIVAJA-GRADNJA» d.o.o. Zavidovići),
- Kopija Rješenja broj: 06-23-2194/19-UP-1-2 o odobrenju izvođenja radova na izmjeni namjene (iz djelatnosti proizvodnje betonske galanterije u proizvodnju praškastih građevinskih materijala), rekonstrukciji i dogradnji postojeće proizvodne hale izdatog dana 29.10.2020. godine od strane Službe za upravu geodetskih, imovinsko pravnih poslova i urbanizma Općina Zavidovići,
- Kopija Rješenja o upotrebi objekta/izmjeni namjene, rekonstrukcija i dogradnja postojeće proizvodne hale broj: 06-19-1693/21-UP-1-5 izdatog dana 16.06.2021. godine od strane Službe za upravu geodetskih, imovinsko pravnih poslova i urbanizma Općina Zavidovići,
- Idejni projekat – hidrotehnička faza za Fabriku praškastih materijala Zavidovići Investitora «MGV GRADNJA» d.o.o. Zavidovići urađen u svrhu pribavljanja vodnih akata od strane URBIS CENTAR d.o.o. Banja Luka (broj: 38-P/2021, januar 2021. godine) – na uvid,
- Glavni projekat – izmjena namjene, rekonstrukcija i dogradnja proizvodne hale Investitora «MGV GRADNJA» d.o.o. Zavidovići urađen od strane «MOSANA» d.o.o. Žepče broj: MGV-03-02/19, mart 2019. godine i revidovan od strane «LEDoux» d.o.o. Žepče, oktobar 2020. godine (na uvid),

- Elaborat o zaštiti okoline «MGV GRADNJA» d.o.o. Zavidovići – Pogon za proizvodnju praškastih materijala urađen od strane Instituta za zaštitu, ekologiju i obrazovanje d.o.o. Tuzla, septembar 2016. godine (na uvid),
- Izvještaj o monitoringu kvaliteta i kvantiteta otpadnih voda broj: 7-677-7135/23, novembar 2023. godine urađen od strane «TQM» d.o.o. Lukavac,
- Detaljan dinamički plan sa aktivnostima, finansijskom procjenom i rokovima realizacije za 2024. i 2025. godinu za izgradnji sistema za prikupljanje, tretman i ispuštanje tehnoloških otpadnih voda potpisan i ovjeren dana 05.03.2024. godine od strane odgovornog lica podnosioca zahtjeva «MGV GRADNJA» d.o.o. Zavidovići,
- Kopija uplatnice upravne takse.

Nakon izvršenog uvida u dostavljeni zahtjev i priloženu dokumentaciju utvrđeno je da su uz zahtjev dostavljeni potrebni prilozi, te je ovaj organ u skladu sa odredbama Zakona o upravnom postupku pokrenuo postupak u cilju utvrđivanja relevantnih činjenica u ovoj upravnoj stvari.

U skladu sa članom 12. stav (5) i (6) Pravilnika o sadržaju, obliku i uslovima i načinu izdavanja i čuvanja vodnih akata («Službene novine Federacije BiH», broj 31/15, 55/19, 41/20 i 63/22), izvršen je obilazak predmetnog kompleksa u ul Tvornička, grad Zavidovići te je sačinjen zapisnik o izvršenom uviđaju broj: UP-1/21-3-40-528-4/23 od 01.02.2024. godine.

Na osnovu dostavljene dokumentacije i izvršenog uviđaja na licu mjesta utvrđeno je sljedeće:

Predmetni proizvodni kompleks objekata izgrađen je na lijevoj obali rijeke Bosne u ul Tvornička u Zavidovićima. Na parceli označenoj kao k.č. broj: 1295/4 K.O. Zavidovići izgrađena je betonara kapaciteta 20-24m³/h (izdato rješenje o upotrebi/legalizaciji bespravno izgrađenih objekata 2009. godine od strane nadležnog Ministarstva Ze-do kantona) a ranije izgrađena hala za proizvodnju betonske galanterije je adaptirana i rekonstruisana u halu sa postrojenjem za proizvodnju praškastih proizvoda (izdato rješenje o upotrebi u junu 2021. godine od strane nadležne službe Općine Zavidovići). Osim navedenih objekata kompleks čine djelimično uređene radne i manipulativne površine, taložnik, separator ulja i masti sa koalescentnim filterom, plato za pranje vozila za transport betona, okno za monitoring. Snabdijevanje pitkom vodom za sanitarne i tehnološke potrebe riješeno je priključkom na gradski vodovodni sistem.

Pogon za proizvodnju praškastih materijala obuhvata bijelu (dekorativni malter) i sivu liniju proizvoda (ljepila za keramiku, mašinski malteri, ljepilo za siporeks i stiropor). Proces proizvodnje je potpuno automatizovan - instaliran je sistem za prikupljanje prašine (3 filterska sistema). U samom procesu proizvodnje praškastih materijala (planirani kapacitet je 10t/h gotovih proizvoda) se ne koristi voda ali se ista koristi u procesu spravljanja betona.

Tehnološke otpadne vode nastale u procesu spravljanja betona i pri pranju vozila za transport betona i tehnološke opreme se sistemom kanala prikupljaju i odvođe na tretman u taložnik. Izdvojeni pijesak i sitne kamene čestice se vraćaju u proces proizvodnje a prečišćena voda se nakon taloženja direktno ispušta u recipijent – rijeka Bosna (mjerno mjesto br 1).

Tehnološke otpadne vode nastale pranjem tehnološke opreme u postupku proizvodnje praškastih proizvoda (pranjem kalupa i posuda u prostoru laboratorije) i povremenim pranjem poda hale se zajedno sa onečišćenim oborinskim vodama sa platoa, radnih i manipulativnih površina prikupljaju zasebnim kanalizacionim sistemom sa slivnim rešetkama te odvođe na tretman u separator masti i ulja. Prečišćene vode se preko okna za monitoring, ispuštaju u rijeku Bosnu (mjerno mjesto br 2).

Parcela na kojoj je izgrađen predmetni kompleks objekata je djelimično ugrožena velikim vodama rijeke Bosne ranga pojave 1/100. Manipulativne i radne površine odnosno radni platoi nisu završno betonirani/asfaltirani.

Pravno lice «MGV GRADNJA» d.o.o. Zavidovići je posjedovalo Rješenje o vodnoj dozvoli broj: UP-1/21-3-40-460-4/21 izdato dana 22.11.2021. godine od strane ove Agencije sa rokom važenja dvije godine od dana pravosnažnosti Rješenja. Navedeno Rješenje o vodnoj dozvoli izdato je u skladu sa članom 26. stav (1) Uredbe o uslovima ispuštanja otpadnih voda u okoliš i sisteme javne kanalizacije («Službene novine Federacije BiH», broj: 26/20 i 96/20) uz uslov da se realizuju aktivnosti definisane tačkom 3.2., 3.3., 3.4. i 3.5. dispozitiva navedenog rješenja.

Prilikom uviđaja na terenu utvrđeno je da navedeni uslovi nisu ispunjeni tj. nisu završene aktivnosti definisane navedenim tačkama dispozitiva Rješenja u periodu važenja istog.

Od ponosioca zahtjeva je u skladu sa članom 1. stav (1), (3) i (4) Uredbe o izmjenama i dopunama Uredbe o uslovima ispuštanja otpadnih voda u okoliš i sisteme javne kanalizacije («Službene novine Federacije BiH», broj: 26/20, 96/20 i 1/24) dopisom broj: UP-1/21-3-40-528-5/23 od 12.02.2024.

Spisak aktivnosti i mjera sa finansijskom procjenom za ulaganje, zadanim rokovima realizacije svake pojedine aktivnosti i konačnim rokom za završetak aktivnosti na izgradnji i puštanju u rad sistema za prikupljanje, tretman i ispuštanje onečišćenih otpadnih voda na obrascu iz Priloga A ove Uredbe, razrađen po godinama i mjesecima sa konačnim rokom realizacije najkasnije do roka 30.06.2026. godine.

Podnosilac zahtjeva je dana 06.03.2024. godine putem mail-a, te dana 08.03.2024. godine putem pošte dostavio traženi dinamički plan na obrascu iz Priloga A Uredbe. U dinamičkom planu su navedene aktivnosti i rokovi sa finansijskom procjenom za ulaganje na izgradnji i puštanju u rad sistema za prikupljanje, tretman i ispuštanje tehnoloških otpadnih voda na predmetnoj lokaciji za 2024. i 2025. godinu. Dostavljeni dokument je poslužio za definisanje uslova iz tačke 3.2. ovog Rješenja. Na osnovu uvida u dostavljeni dinamički plan utvrđeno je sljedeće:

- Krajnji rok za realizaciju radova je 31.12.2025. godine.
- Rokovi za realizaciju pojedinih aktivnosti iz dostavljenog dinamičkog plana koji je sastavni dio ovog rješenja su navedeni u tački 3.2. dispozitiva.

Na osnovu dostavljene dokumentacije i uviđaja izvršenog na predmetnoj lokaciji, u svrhu smanjenja negativnih uticaja predmetnog pogona i aktivnosti na stanje voda i vodni režim, podnosiocu zahtjeva su ovom vodom dozvolom u tački 3. dispozitiva Rješenja propisani uslovi kojih se dužan pridržavati prilikom korištenja objekta u skladu sa odredbama članova 53. i 116. Zakona o vodama i članova 12. i 13. Pravilnika o sadržaju, obliku, uslovima, načinu izdavanja i čuvanja vodnih akata i odredbama člana 3. tačka s) i člana 15. Uredbe o uslovima ispuštanja otpadnih voda u okoliš i sisteme javne kanalizacije.

Tačka 4. dispozitiva Rješenja je propisana u skladu sa tačkama 12. i 35. Pravilnika o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte i posebnih vodnih naknada («Službene novine Federacije BiH», broj 92/07, 46/09, 79/11 i 88/12) i Odlukom o visini posebnih vodnih naknada («Službene novine Federacije BiH», broj 46/07, 10/14 i 03/16).

Konstatuje se da je podnosilac zahtjeva, «MGV GRADNJA» d.o.o. Zavidovići ispunio minimum uslova za izdavanje vodne dozvole za aktivnost koja može privremeno ili trajno degradirati kvalitet voda ili ometati poboljšanje njihovog postojećeg kvaliteta u postupku rada i za ispuštanje tehnoloških otpadnih voda u prirodni recipijent sa lokaliteta betonare sa postrojenjem za proizvodnju praškastih materijala u ul Tvornička, grad Zavidovići, te je riješeno kao u dispozitivu ovog Rješenja.

Podnosilac zahtjeva uplatio je posebne troškove prema Zaključku ove Agencije broj: UP-1/21-3-40-528-2/23 od 22.12.2023. godine.

Podnosilac zahtjeva je uplatio upravnu taksu u iznosu od 70 KM U skladu sa Zakonom o izmjenama i dopunama zakona o federalnim upravnim taksama i tarifi federalnih upravnih taksi («Službene novine Federacije BiH», broj 06/98, 8/00, 45/10, 43/13 i 98/17).

Uputa o pravnom lijeku:

Protiv ovog Rješenja može se uložiti žalba Federalnom ministarstvu poljoprivrede, vodoprivrede i šumarstva u roku od petnaest dana od dana prijema Rješenja.

Žalba se predaje ovom organu neposredno ili preporučeno poštom. Žalba se taksira sa 15 KM administrativne takse prema tarifnom broju 3. Tarife federalnih administrativnih taksi.

Obradivač akta:

Nermina Hodžić, dipl.ing.građ.

Po ovlaštenju
Rukovodilac sektora za izdavanje vodnih akata

Haris Ališehović, dipl.ing.građ.

Dostaviti:

- «MGV GRADNJA» d.o.o. Zavidovići
ul Tvornička bb, 72220 Zavidovići
- AVP, ISV – Vodna knjiga
- Sektor 50,
- Sektor 40, arhiva
- oglasna ploča – AVP Sava